

續

古

文

苑

續古文苑卷第十九

賜進士及第授通奉大夫山東通省督糧道加三級孫星衍撰
碑志五

右拾遺陳公旌德碑

唐趙儋

大唐劍南東川節度觀察處置等使戶部尚書兼梓
州刺史兼御史大夫鮮于公爲故右拾遺陳公建旌
德之碑

公諱子昂字伯玉梓州射洪縣人也其先居於潁川
五世祖方慶好道得墨子五行祕書白虎七變隱於
郡武東山子孫因家焉生高祖湯湯爲郡主簿湯生
曾祖通通早卒生祖辯爲郡豪傑辯生元敬瑰偉倜

儻弱冠以豪俠聞屬鄉人阻飢一朝散粟萬斛以賑
貧者而不求報年二十二鄉貢明經擢第拜文林郎
屬青龍末天后居攝遂山棲餌術殆十八年元圖大
象無不達嘗學術擬張平子風鑒比郭林宗公即文
林元子也英年過人彊學冠世詩可以諷筆可以削
人罕雙全我能兼有年二十四文明元年進士射策
高第其年高宗崩於洛陽宮靈駕將西歸於乾陵公
乃獻書闕下天后覽其書而壯之召見金華殿因言
伯王大畧君臣明道拜麟臺正字由是海內詞人靡
然向風乃謂司馬相如楊子雲復起於岷峨之間矣
秩滿補右衛曹每上疏言政事詞旨切直因而解罷

稍遷右拾遺。屬契丹以營州叛。建安郡王武攸宜親
總戎律。特詔左補闕屬之。迨及公叅謀幃幕。軍次漁
陽。前軍王孝傑等相次陷沒。三軍震懼。公乃進諫。感
激忠義。料敵決策。請分麾下萬人。以爲前驅。奮不顧
身。上報於建安。建安懷諫。禮謝絕之。但署以軍曹掌
記而已。公知不合。因登薊北樓。感昔樂生燕昭之事。
賦詩而流涕。及軍罷。以父年老。表乞歸侍。至數月。文
林卒。公至性純孝。遂廬墓側。杖而後起。柴毀滅性。天
下之人莫不傷歎。年四十有二。葬於射洪。獨坐山。有
詩十首。入正聲集。十卷著於代。友人黃門侍郎范陽
盧藏用爲之序。以爲文章道喪五百年。得陳君焉。由

是大中之詞紙貴天下矣有子二人並進士及第長
曰光官至膳部郎中商州刺史仲曰斐歷河東藍田
長安三尉卒官光有二子其長曰易甫監察御史次
曰簡甫殿中侍御史斐生三子長曰靈甫次曰競甫
衆甫皆守緒業有名於代劍南東川節度使兼御史
大夫梓州刺史鮮于公自受分閫之征也初年謀始
立法二年人富知教三年魯變於道乃謂幕賓曰陳
文林散粟萬斛以賑鄉人得非司城子罕貸而不書
乎拾遺之文四海之內家藏一本得非臧文仲立歿
而不朽乎於戲陳君道可以濟天下而命不通於天
下才可以致堯舜而運不合於堯舜悲夫昔孔文舉

爲鄭元署通德門。蔡伯喈爲陳寔立太丘頌。異代思賢之意也。況陳君顏閔之行。管樂之材。而守牧之臣。久闕旌表。何哉。爰命末學。第敘豐碑。表厥後來。是則是效。其頌曰。

有矯之後。封於陳國。根深苗長。卅載明德。文林大器。質匪雕刻。學術鉤深。風鑒詣極。代公耿光。元藻識施。不求報。退身自默。岷峨降靈。拾遺挺生。氣總三象。秀發五行。才同入室。學匪獵精。明明天后。羣龍効庭。矯矯長離。軒飛梁益。封章屢抗。矢陳刑辟。匪君伊順。惟鱗是逆。九德未行。三命惟錫。帝命建安。遠征不伏。咨公慕畫。騁此驥足。惟王玩兵。愎諫違卜。忠言不納。

前軍欲覆遂登薊樓冀寫我憂大運茫茫天地悠悠
沙麓氣衝大陰光流義士養薇人誰造周可謂遂放言於感遇亦阮公之詠嗟乎運不
懷己而已而陳公之微意在斯表辭右省來歸溫
清如何風樹不寧不令廬墓之側柴毀滅性管輅之
才管輅之命惟國不幸非君之病我鮮于公中肅恭
懿光明不融爲君頌德穆如清風日月運安江漢流
東不閉其文永昭文雄

唐大歷六年歲次辛亥

十月癸丑朔日建前監察御史趙儋撰

大唐贈揚州大都督段府君神道碑銘并序

巨唐大歷己未歲春正月段府君之子四鎮北庭涇
原鄭穎等州節度使開府儀同三司御史大夫張掖

郡王曰秀實追琢貞石光昭先考展孝思旌休烈也夫流濬者其源長德充者其後大更八姓而不厝五福府君其人焉君諱行琛字行琛宗周柱史垂其裔前漢都尉昌其業太尉之威懷戎落驃騎之光啓冀方四燕兩魏高位碩德扶疎於史牒者向二百人以至高門平原忠武王孝先弼亮北齊奄荒東夏恢武經而抗衡西帝揆文教而師尹南宮曾門德濬初罹否運播遷隴坻度地肯堂鬱爲望姓在周辟奉朝請入隋直文林館靖恭厥位獲沒先朝大父操握機未發早齡卽世考達從調夏官藝極龍豹致果爲毅職統熊羆皆保家之良主府君生知六行之美學究五

經之奧。旣齒鄉賦。高標甲科。簡脩獨耀於錦衣。從事
仍屈於黃綬。學有著位。我實當之。郡有子弟。我實誨
之。自隴及岐。鼎新儒行。雖東里子產。西蜀文翁。誠存
物應。蓋未之比。厥有成績。聞於家邦。厥名位而知止。
賁上園而用晦。我國家雖右斷匈奴之臂。時脩大刑。
於絕漠之表。旁求百夫之特。永清萬里之外。府君顧
謂子張掖王曰。爾居能服勤。性成惟孝。出可承命。遊
且有方。虎穴不探。龜組何獲。爾之元昆介弟。可以供
指使。我之先人遺業。可以終餘齒。忠不擇事。安實敗
名。因剛慈以激昂。俾宣力以勤遠。君子謂府君知愛
子之道矣。王投筆占募。馳驛徂征。坐籌必勝之畧。動

獲前禽之利。洎王宦登通貴。佐律副軍。銀章已綰。玉
關未入。府君溫其在邑。樂且有儀。九流百氏。經耳輒
誦。四憂十義。因心必達。然猶深居自珍。與物爲春。希
言中倫。知機其神。內葆光以恬真。外行簡以依仁。子
獲奉親之祿。欲養而不待。身寄有涯之生。遷化而無
愆。天寶九載。夏之季序。邁疾于汧陽御史里之第。乙
酉。奄歸無物。其季於斯。七十五稔。夫人樂平狄氏。吳
山縣丞哲第六之女。心婉志柔。靜專動直。承筐而繁
衍其實。主奠而敬恭無忒。下壽初登。先時永逝。門子
祥穎。仲子秀成。季子同穎等。柴立長號。稽謀宅兆。明
年春孟序辛亥。遷皇祖及諸父之無後者。偕葬於隴。

山東麓柏谷掌次列三墳周施一域送終之禮備矣屬歲旅天朔塵驚薊門徵會沙場之右殄殲鐵額之醜王飛郵及國擗地崩心夷凶難遂於情禮哭墓復隨於軍正既清海裔又牧回中一莅疲人荐彰丕績廣德二年秋九月乙未詔追贈府君祕書省著作郎夫人太原縣太君恩深歿後之寵慶表生前之訓上又以王翊亮三節綏御七戎致位崇獨坐之班成軍雪多壘之恥大歷十年夏五月詔加贈府君婺州刺史夫人太原郡太夫人十一年冬舊使尚書左僕射扶風郡王馬璘邁疾弥留表王請貞師律詔仍遷御史大夫既操二重之權克施五利之策平涼安定曲

荷其亭育先零罕開遙服其威信四封無聳三務有成十三年五月命朝丹禁面疆戎索帝曰朕翁孫也俾寫眞麟閣彙稜而遣焉及季夏壬寅又贈府君揚州大都督夫人忻國太夫人榮親揚名二美兼華傳曰子之能仕父教之忠詩曰維其有之是以似之見於府君矣雖封植無改而銘頌未刊過聽謬採于芻蕘脩詞愧陳于質要銘曰

於穆端士神所勞矣貞惠資身義方訓子育德無倦狗名知止宜其後昆式是繁祉繁祉伊何後昆則然西服戎胡東定幽燕殊勩克著湛恩上延贈光三錫慶洽重泉熊軾增寵牛崗啓繇北控汧源西馮隴岫

列塋如始紀石增舊淑德清規終天永茂

大歷

十四年閏五月庚午朔十三日壬午建朝請郎檢校
尚書刑部員外郎兼鳳翔少尹侍御史賜緋魚袋張
增書朝議郎行鳳翔府天興縣尉李同系篆額

故莫州長豐縣令李君墓誌銘

唐貞元三祀五月故長豐宰李君丕卒於幽州潞縣
嗚呼逝水古今悲夫公隴西人也世襲軒裳地清才
幹曾祖知禮宣州司功叅軍祖懷璧汴州陳留縣丞
考許州臨陵縣令公洒然深心抱義育德士林咸
器重之乃昌言薦於元戎遂徵辟爲潞縣丞佐理高
標令名遠著後墨綬長豐化百里之風樂四人之業

俄改任莫州司法叅軍。蘇息萌隸。鈐鍵姦譎。凡登仕
踐位。時議茂宰良掾也。每處其厚。不居其華。果行溫
良。發言砥厲。豈期餘慶罔祐。而禍兮有階。故鵬鳥作
孽。二豎爲祟。沉疾於故林私第。即代之日。春秋六十
有三。無嗣。夫人元氏。晝哭靈帳。恨無三從。傷肝腸之
痿憤。痛終身之惻獨。長女適河東柳氏。名峴。試太常
寺奉禮郎。感深仁之厚恩。盡半子之禮節。力窆棺櫬。
手植松楸。扶塗車。封馬鬣。粵三年建子月。葬於縣之
南三里潞水之右。託一片之琬琰。紀平生之徵獻。俾
山壑之變風烈有遺。而爲銘曰。

屹然孤墳。長城之東。死生永隔。天地不同。吁嗟英靈。

窮泉之中悄悄原野旦暮悲風

石在通州文昌殿壁近年出土見州志

唐吳郡張常洧紀孝行銘碑

唐

孚

君名常洧字巨川句曲人也其先奕世載德賜姓受氏詳乎家牒炳乎國史矣在昔宣王時則有若張仲孝友周人美之列於風雅在悼公時則有若張老恢晉國之圖拯魏氏之急魯史嘉之編於載冊高祖伯卿曾祖克紹並怡情墳典抗志不仕祖處靜皇湖州烏程縣令考璋皇建州司戶君即建州之第四子也幼而聰明長而岐嶷窮百行之源事父母以孝稟五常之性奉親族以和及父母既歿居憂泣血柴毀骨立躬自建冢高數尋手植奇樹盈千餘本然志戀墳

塋終身洒掃雖喪紀踰制而靡釋衰經乃葺結庵居於墓次哀動行路感通神明白鶴翔於林中靈芝生於墓側鄉黨稱其孝郡邑嘉其行錄表上聞優詔允荅復其徭役旌其倚廬三紀於茲情猶一日居嘗疾困殆不勝喪勺飲不入口者累日矣其兄常泳勸令飲食堅執不從兄謂之曰有疾飲酒食肉在禮自有明文蓋無以死傷生也今汝異居幽荒之際而即安於疾殆至滅性又焉得爲孝乎乃曰吾負終身之憂匪惟一日之戚且吾有兄不患死之將至兄有子不患祀之將乏身旣不賴其生口豈復食其味乎君子曰甚哉張氏兄弟孝友之至也非令弟無以知兄之

賢非仁兄無以成弟之美所及其遠哉上以彰聖朝
孝禮之至中以表牧宰教化之極下以明張君錫類
之永此一行也而三善成焉予雖庸愚備知盛美竊
以寵錫之命雖行於門閭紀述之詞曾未標於篆
刻敢直書其事識之貞石焉銘曰

天錫嘉命保佑我唐篤生張君令名是揚令名伊何
純孝克彰終身在戚執親之喪獨居幽荒廬墓之側
喪制既踰哀情罔極衰經弗離甘旨靡食疾苦嬰身
志行不忒節彼高墳巍然如崗草木呈瑞鸞鶴表祥
孝感之至達於聖皇詔命旌美殊其井疆勒名紀行
於門之旁千秋萬祀斯風不忘

集古錄有唐孝子張
常有旌表碣云文字

磨滅僅可見其髣髴注貞元五年考孝子父建中四年癸酉歿廬墓六年以明年貞元五年己巳立此碑也別有咸通十三年碑子在句容張氏義臺得其殘石一片後有潤州句容縣令呂倕及咸通十口等字寶刻類編載張府君旌表碑唐王承福書雷珍題額咸通十三年引諸道石刻錄即其碑也今張氏之裔棄于此階下自余拓本以存故迹惜不得其全文併載於此碑所謂節彼高墳者今在義臺西北後人不知是張氏父母葬處指為古墓又為街道民居隔絕僅以廬墓處為孝子祠耳

周氏墓誌銘

唐王 紳

夫人姓周氏其先汝南人也爰自炎漢達於有唐縣歷衣冠其來尚矣曾王父府君珪皇承務郎勅授荊州三河縣令王大父府君歸皇宣德郎試左贊善大夫賞緋魚袋兼上柱國王父君彥皇彭城郡高望府折衝賞緋魚袋兼上柱國皆業崇儒行世繼簪組間

次門慶逾長夫人則折衝府君之長女幼年貞柔至性純孝凜乎正氣賢行自天雅量絕儔風見難並適佐君子令淑尤彰雍睦承家母儀增書是以儉恭聞惠和不以鉛粉益容但以禮節資德時貞元辛巳歲寢疾於莫亭集賢里之私第伏枕逾月醫無所爲以其年五月十三日奄從於化享年四十八嗚呼天命數盡生也有涯哀哉哲人何不爲壽瑤琴絕聽寶鏡休窺珍玩滿室莫之能守親戚彌切痛無偕老之期岐路感傷嗟有懷仁之德以其年冬十一月八日卜兆於鄭城東南二十五里卅業平原之禮也

堂文集有天寶六載唐故義興周夫人墓誌銘跋曰誌後云以茲吉晨赴杜城東郊之禮也余初疑句有

案盧文弨抱經

脫字及觀大歷間光祿卿王訓墓誌亦云遷厝萬年
縣澧水鄉澧水原之禮也則當時自有此文法此碑
云云亦與雲結長川風悲草樹嗣子操次子摸並殘
彼同例骸毀容能竭孝道慮恐陵谷將變歲序將遷刊石紀
時其銘曰

郡城東南兮渾水湄歲往月來兮無盡期明明寒月
兮對孤壠蕭蕭白楊兮悲風吹

唐莫州唐興軍都虞候兼押衙試鴻臚卿鄭府
君墓誌銘

府君諱王字廷玉本滎陽人也其先因官得地曾祖
亮皇莫州司馬祖備涇州四門府折衝王父泰遊擊
將軍守左武衛大將軍試太常卿咸以文武兼才應

當時之選府君鄉舉孝廉弱冠從事有救世之才軍府推稱以政狀聞於本道時表奏授宣義郎試恒王府司馬權充本州孔目判官吏不敢欺人樂其業時歲儉人飢多盜世亂思理須得其人遂屈充唐興軍左虞候以屏盜賊擒奸摘伏撫弱遏強井邑肅然論功授秩累有拜遷官至鴻臚卿職竟都虞候自主局向三十年閭里懷其仁鄉黨服其義犬不夜吠衣錦晝行水鏡居心不假灰猪以辨僞臨事明斷有同跪鼠以懲愆衆稱才用無窮又拜牙門將內外瞻矚文武繩準洎貞元十七年旌麾撫臨錄侯掩之錫重始終之節賞衣一襲錫馬一匹以其州在關外賴之

襟帶委以守禦無遷易也鄉人改觀閭里拭目昂昂乎固一時之傑也豈期二豎爲災奪人之願以貞元十八年十二月十九日寢疾終於鄭亭春秋六十有八邑悲巷哭春不相杵夫人河閒邢氏以貞元二年三月四日先府君捐世享年四十有八銀青光祿大夫檢校太子詹事殿中侍御史讓之孫平昌縣令璫之女適配君子義不失於三從奉事舅姑禮乃全於四德爲六親軌範作三族楷模得女適人而宜室生男至孝以承家皆夫人餘慶之所鍾府君義方之所教也嗣子惟興等痛乎松楸未樹歲月遄臻先遠有期不敢違卜奉以貞元十九年歲次癸未十一月戊

寅朔十三日庚寅祔於州城南二十五里顧義鄉三方之原禮也是日也素車隨紼白馬臨棺雲慘寒天風悲野樹恐陵谷變遷銘以誌之辭曰

平原四顧兮塚壘壘左枕故園兮右滹水嗚呼鄭君兮來宅此白楊蕭蕭兮莫風起何嗟原夜兮自有明珠兮照千里

清河張府君墓誌銘

唐柳宗元

貞元二十年六月一日清河張公諱曾寢疾即世於莫亭嘉深里之私第享年七十六自屬纊至於移窆朋從親暱州里士君子無不慟怛嗚呼仁賢之云亡也哉惟公受姓黃而分歷代茂盛源流益別公

即清河之緒。曾祖皇太子諮議郎諱崇。祖皇中府折衝諱操。父皇太子內直郎諱公。即內直郎嗣也。早歲有節克壯。心拳拳禮容。執無倦。逮夫弱冠。遵道秉義。汪汪然不可得而親。不可得而友。挺出常度。機畧內蘊。時薊州刺史御史中丞榮公。公才最以從事情。以道契三捐而進。受靜塞軍營田判官。恭儉蒞職。勲績明著。甄錄奏聞。受遊擊將軍。守右領軍衛幽州開福府折衝都尉員外。置同正員。賜騎都尉。公踈勢賊諂。心不苟合。恬淡爲頤年之用。視簪組爲伐性之具。遂辭名晦跡。高卧雲物。因家於三河邑。背郭而東。得林巒之勝致也。暨乎年逾不惑。以長子

瓊佐鄭亭候嘉聲洋洋多歷年數由是閱實觀政巾車以來郡邑清暢禮容大備釋我願斯不返駕每道人貞士談真空微妙之性探原迷頤之旨浩浩方寸洞豁塵境不其致歟嗟乎大道無涯天命有定雖聖明不能越常運而超物外哉公以疾起無妄情不嗜藥顛顛居易悔咎莫有星歲幾同大漸長往嗚呼天富其道而關於壽謂之何哉夫人北平田氏而得禮有子二人瓊等卜祔先塋龜筮告吉以其年十一月一日窆於任丘東北長丘鄉原禮也二嗣號擗痛深泣血哀告以先遠有期請以誌之宗元承命不忤刻之貞石銘曰

蘭芷其馨金玉其貞碎而折之何神不明茂旌其英
德立行成悠悠銘旌洋洋懿聲孝子令孫宅兆郊原
龜筮叶從慶流後昆

柳子厚文集無此文河間府志云字多缺泐錄在任上舊志邑

人謂今其碑石尚存長豐寺陷置壁間

唐故朝議郎檢校尚書戶部郎中兼襄州別駕
上柱國韓昶自爲墓誌銘并序

昌黎韓昶字有之傳在國史生徐之符離小名曰符
幼而就學性寡言笑不爲兒戲不能闇記書至年長
不能通誦得三五百字爲同學所笑至六七歲未解
把筆書字即是性好文字出言成文不同他人所爲
張籍奇之爲授詩時年十餘歲日通一卷籍大奇之

試授諸童皆不及之。能以所聞曲問其義，籍往往不能答。受詩未通兩三卷，便自爲詩。及年十一二，樊宗師大奇之。宗師文學爲人之師，文體與常人不同，昶讀慕之。一旦爲文，宗師大奇其文中字，或出於經史之外。樊讀不能通，稍長，愛進士及第，見進士所爲之文，與樊不同，遂改體就之。欲中其彙，年至二十五及第，釋褐。柳公公綽鎮邠，辟之試。宏文館校書郎、相國竇公易直辟爲襄州從事，校書如前。旋除高陵尉，集賢殿校理。又遷度支監察，拜左拾遺。好直言，一日上疏，或過二三文字之體，與同官異。文宗皇帝大用其言，不通人事，氣直不樂者，或終年不與之語。因與俗

乖不得官。相國牛公僧孺鎮襄陽。以殿中加支使。旋拜秘書省著作郎。遷國子博士。因久寄襄陽。以祿養爲便。除別駕。檢校禮部郎中。丁艱服除。再授襄陽別駕。檢校戶部郎中。大中九年六月三日寢疾。八日終于任。年五十七。其年十二月十五日葬孟州河陽縣尹村。娶京兆韋放女。有男五人。曰緯。前復州叅軍。次曰綰。曰緄。曰綺。曰紱。舉進士。女四人。曰茱。曰谿。曰當。曰著。在室。曾祖叡素。朝散大夫。桂州長史。祖仲卿。祕書省祕書郎。贈尚書左僕射。父愈。吏部侍郎。贈禮部尚書。謚曰文公。銘曰。

噫韓子。噫韓子。世以昧昧爲賢。而白黑分衆。以委委

爲道而曲直辨生有志而卒不能就豈命也夫豈命也夫。孤子綰書并篆。

唐故滎陽鄭府君夫人博陵崔氏合祔墓誌銘

并序

唐秦貫

鄭之先自周王封舅之地因而氏焉。別派五流深源一至是以滎陽之望得爲首冠。其下公侯接武台衡繼迹雕軒繡軸之榮。羽蓋朱轡之盛。由魯史記迄於唐春秋實鄭氏爲衣冠之泉藪也。高祖卅斌皇左司郎中。懿隰二州刺史。新鄭縣開國男。食邑三百戶。曾祖元嘉皇新都長水縣令。襲封新鄭縣開國男。祖有常。皇吏部常選。襲爵新鄭縣開國男。烈考探賢。皇衛

州昌樂朝城莘縣令府君諱遇字■■皇試太常寺
協律郎文業著於當時禮義飾於儒行少有個儻之
志長負瓌奇之名不苟譽以求容每親仁以竭愛爲
中外模範成友朋宗師樂善孜孜不愠知鮮量苞江
瀆氣合風雲今之古人人雖上出神不優德配壽胡
差先夫人之亡蓋卅一霜也享年六十夫人博陵崔
氏令門清族慶餘承善四德兼備六親雍和仁讓得
於天真慈惠立於素尚母儀內則動靜可師禮行詩
風進止成法雖婕妤女史大家經教承之於諷習推
之於行源者亦異代殊人其歸一旨未亡之歎孀齡
杳然玉没何先蘭然遽至以大中九年正月十七日

病終於淇隩之私第享年七十有六以大中十二年
二月廿七日合祔於先塋之側其鄉里原隰之号載
於舊記此闕而不書女一人適范陽盧損之嗣子六
人長曰頊攝汲縣丞知縣事早亡次曰珮早亡次曰
瑾次曰玘次曰璩次曰琬咸繼以遺芳克修至行銜
哀茹毒追攀罔極將營護■窆泣告於業文者爲之
銘云

仕門雙美兮令德咸芳甲族齊茂兮英華克彰允文
武兮書劒名揚蘊儀度兮閨門譽長珠沈玉沒兮人
誰靡傷桂殞蘭凋兮共泣摧香垂修名兮允謂不亡
傳事盛兮多載彌光聽悲風兮松韻連崗刻貞石兮

永志(元)堂

給事郎試太常寺奉禮郎攝衛州司

法參軍秦貫撰

又一碑鄭遇作鄭
恒疑後人所改

後魏洛州刺史侍中兼太師昌黎馮王新廟碑

唐馮(元)德

王諱熙字晉國冀州長樂人也伯祖諱跋建國北燕
傳位於昭成皇帝諱(宏)即王之烈祖也魏太武帝滅
北燕徙其家屬於代王以帝者子孫遂交婚於魏室
魏文成帝納王妹爲后即文明太后是也王尚博陵
長公主以敦慎博愛歷事三朝累拜冠軍將軍侍中
中書監太傅太師之任進爵昌黎王及魏孝文帝即
位前後娶王三女且二爲后一爲昭儀文明太后臨

朝王以師傅之重寵極禁壺內不自安求外任爲洛州刺史侍中太師如故洛陽經永嘉大亂之後宮寺毀廢王爲政仁恕而酷信釋教凡出俸祿於諸州鎮建佛圖精舍合七十二處今之廟地舊建北邙寺乃其一也今佛圖基址尚存其寺碑文中書侍郎賈元壽所製孝文每登寺讀碑嘉歎不已後徵歸代遇疾而薨屬遷居洛京遽詔有司爲辦喪事公主先薨命開其墓併二柩俱向伊洛皇太子赴代迎弔將葬贈假黃鉞侍中督十州諸軍事大司馬太尉冀州刺史加黃屋左纁備九錫前後羽葆鼓吹有司奏謚曰武孝文爲撰誌銘纓服親臨墓所以前魏書備載其事

但不言封樹之處及廟立之由墓與廟當不相遠也其廟豈州人思王之德衆所建乎不然寺沙門所置也至今爲洛北之望祀年代寔遠雖牲牢日享而室壁侈頽大中六年六月洛之豪族孟州長史焦宗美特捨家財大新厥宇兵衛儼列廟貌益崇愚別墅寄溫谷川東走十里直王之廟每見遠近里社坎鼓啾管以趨之及問王之名位爵邑皆失其傳乃乘暇謁拜碑板堙滅莫識何從退尋家牒考於魏史是知即愚之十二代祖也伏念甘棠勿翦邵德實思若非績化深洽民心即何能五百年之後而血祀不絕乎恐盛烈沈翳無復彰明不敢多文遂斲石重紀

大

唐咸通八年歲次丁亥十一月壬子九日甲辰刻十
二代孫鄉貢進士元德述弟進士元度篆額弟進士
元錫書十二代孫元規元貺元範元質元靜并前八
人同建立孫璋鐫

唐故左拾遺魯國孔府君墓誌銘并序

唐鄭仁表

咸通十五年三月侍講學士右僕射太常孔公以疾
辭內署職其元子左拾遺養疾亦病逾二旬太常公
病少閒拾遺疾亦閒又旬日太常公薨拾遺哭無時
後七十六日亦終嗚呼求諸古未聞也仁表與拾遺
同歲爲東府鄉薦策第不中等再罷去明年偕宴於

東堂宴之日博陵崔公薨出紫微直觀風甘棠下表
爲支使校芸閣書拾遺始及第乞假拜慶新進士得
意歸去多不伏拘束假限往往關試不悉集責曹久
未畢公事故地遠迨二千里例不給告時僕射太常
公節制天平軍以是勤不得請拾遺曰人之多言必
以我爲宴安訖春不宴年少乘喜氣赤春頭竟不對
狎客持一盃酒人以爲難關試日都堂中捐別同年
徑出青門外經所爲從事州入院判案十日東去府
適罷賢諸侯爭走羔鴈馳弓旌竟不能致徵爲渭南
尉直宏文館久之會大學士出將聲韋竟不就僕射太
常公罷鎮居洛中拾遺伏安定省不嘗言仕宦旋以

萬年尉復怙文職無西笑意僕射徵拜司戎貳卿拾遺由侍行乃赴職越一月今許昌太傅相國襄陽公爲河中奏署觀察判官假監察御史故事赤尉從相府得朱紱殿中公昆仲間有未至者求裏行官不改服色人人美譚之俄轉節度判官從知之道皎然明白和不柔守而通內盡匡補而外若不知相君待之異禮俄拜左拾遺內供奉嗚呼止於是何也春秋始卅三矣惜哉公至性自生知雖欲全其禮傳於後開強忍抑不能俯就始得疾不言於人因晡哭若絕左右始知有病句甚矣句卧堊室中不復進饘餌疾益亟方有歸常所居舍悉召骨肉迨僕使唯言僕射

公葬時事。指揮制度。必以古禮。戒誨約束。委曲備悉。左右皆泣。公曰。吾平生無纖小不是事。天報我甚厚。使亟得歸侍地下。尔盍賀而返。以泣耶。吾自遂性。不能無傷生。全大孝。送終設祀。宜益儉削。無以金鉛纖華爲殉。無以不時之服爲殉。吾幼苦學。尤嗜左氏傳。所習本多自讎理。宜置吾左右。友人鄭休範多知我所執守。相視若親弟兄。我亦常以所爲悉道之。請以誌我。彼不能文。必盡其實。言竟撫弟妹。若將千百里。爲別者。視妻子若將一兩夕。不面者。而怡然其容。如有失而復得。已而終嗚呼。其喜歸侍乎公。謝世之月。餘日前。與二季處閭室中。忽援毫書廿八字于室內。

東展之上若隱語而加韻焉曰許下無言奪少年震而不雨月當弦風濤渭逆舩艣沒從此無舟濟大川初玉季載考其義莫究指歸旣痛絕手足若洗然而悟曰許無言是午字今歲在午也震不雨是辰字其哀瘵至甚移歸院就醫是辰日及圖奄然之日驗於官歷是上弦日又應月當弦之讖也吁似有所潛受於冥昧閒何懸知之若是也憶於洛陽里第始相與定交公曰何以契我余曰死患難先祿位託孤寄命同休共感此義交也見善相勉也見利相遠也言之而必行守之而必固一旦離此則攻而絕之使處世爲正人沒身無怨言斯益友也余將與吾子契之自

是過必相攻。善必相激。相成如恐失。相畏若臨敵。雖朝夕共行止。人不以爲朋比。亦君子之能賢善誘也。嗚呼。公之文之學之精明。道行如雷聲。日光無耳目者。則不知也。公之計始聞。人人如有亡。碩生鉅賢。心死氣脫。道之不行也。天何心焉。公諱紓。字持卿。魯司寇四十代孫。繼繼承承。世濟不墜。閒生傑出。磊落相望。曾祖岑父。皇任祕書省著作佐郎。贈司空。祖戮。皇任禮部尚書致仕。贈司徒。父溫裕。皇任檢校右僕射兼太常卿充翰林侍講學士。冊贈司空。皇妣河東薛氏。族大而顯。先司空公廿八年。即世。公娶京兆韋氏。山東清甲家也。有二子。男曰鐵婢。始十歲。甚肖似。憶

與公約生子命名必如兄弟愚之子曰後魯他日鐵
婢當以還魯字之易云積善之家必有余慶善之教
必闡於道儒釋釋固無嗣皇家公家道儒之餘慶也
公又賢而無祿其後益大以昌女少於男銘曰

嗟嗟夫君嗟嗟夫君孔聖遺允顏回後身高高者天
幽幽者神幽幽不見高高不聞不見不聞又何足以
云云鎮海軍節度掌書記將仕郎殿中侍御史

內供奉賜緋魚袋鄭仁表撰并書

案唐書載鄭肅子仁表以門閥文章

自高曰天瑞有五色雲人瑞有鄭仁表選家多未載
其文此碑是其撰文書石文既不佳字亦如常存之
以質後人知誇大之過情也碑中有旁注云去聲文
云句者二處亦前人未有之體餘唯杜順和尚行記
復見下旁注
胡甸反耳

唐故清河郡張氏夫人墓誌銘 唐孫 珣

噫夫人姓張氏其淑慎貞素稟自生知退讓儉遜不從於訓祇奉晨夕終始若一吁言乎不豫葬我私室蘭摧春霧蓮墜秋風隙影難迴逝波不返男一人高姐電影未分槿花已落女二人長曰奴哥穠花未開嚴霜暗墮次曰郭兒少髮未摠繼我門嗣夫人年四十有三以景福元年冬十二月二十日卜兆於府城之南雲門之下樹上隴而銘銘曰

日月有度兮生死無常白晝其速兮元夜何長澠水爲鄰兮雲門是鄉千年万祀兮春露秋霜 夫樂安郡孫珣述

時景福元年歲次壬子十二月辛未朔二十日庚寅
孫珣紀

陳公神廟碑

唐齊光乂

在昔隋氏喪君齊人乏主代厄淪胥我大將運匡救
之謀先州里之義存乎蔽捍用伺昭蘇初志未躋良
圖奄墜災生福始遺恨如何公諱果仁字世威誕受
丕祉其昌來裔有媽之後人莫與京洪惟發靈乃降
時傑鼎角匿犀之異雄深魁武之姿貫藝造奇無所
不至立能事於艱虞之際建殊蹤於混亂之秋韞義
生風鼓動流俗全吳之地幸賴以安招定鄰邦輯寧
徒旅江湖嚮應懷赴如歸沈法興率衆而來假我鼻

息初規景附末肆傾夷因何匪仁暴戾斯甚自遺覆
敗竟取淪亡至於敘官遊歷系業事咸不朽跡著無
方名與日月輪迴功隨載籍舒卷已詳於宣法師所
製寺碑若乃生志未盡餘勇仍存息氣沴於疵癘降
精靈於巫覡物靜裁異時無大昏人到於今罔不懷
德每以公之諱日爰伸仲夏之中展祀建齋所在充
遍雖掃地以祭且貴懇誠而廟宇未崇寧昭節敬邑
老慶州都督府永清府左果毅都尉上柱國賜緋魚
袋張智景與福業寺長老義先等聚族而謀發言同
人不召而萃邑中之衆實慰我心疇其經營委以財
物始則運思而斲之丁丁終於用成而新廟奕奕座

盈神氣侍列鬼雄威深沈以肅然狀煜爚而疑動有以底明祇之位有以昭介祉之儀及夫沐蘭湯奠椒醕揚枹拊鼓緩節安歌華彩服與瓊芳會陳巫與楚舞求非曲禱祀必正辭無紛若之言致馨香之信由是上感宸心旁追祀典降中使被懷濡聖澤覃溥天光照爛豈秦祠漢享之類可得同乎浹逮下之祈演無疆之助或飲食有訟或契文不明凡百無良深衷莫辨微見誠請立彰其效負者乃凶竟貽潛慝攘諍掩息望境自清比夏積憊陽秋淫霖雨捨我穡事妨於農收至於三至於四時其賢守李公行穆民勤卹之意傍徨匪寧率領官屬長史李公昌峽司馬上公

從心晉陵縣令岑公况武進縣令何公據等果至虔誠景刻俱應澤及千里無所不周使君涵道德之尊豐惠和之厚艱難之辰晏然無事豈不以忠信於物而昭明於神乎本宰何公學以入政優于子人深撫育之恩流清白之稱咸思善貺冀荅宏慈神之聽之庶同景福今餘寇未寧尚煩剪滅神而助順靈其運乎昔者聖王之制禮能禦大災能捍大患以勞定國以死勤人則所必祀而明德報功大將生爲司徒足以主卅地歿爲貴神足以鎮邪惡間閭綏祐存亡以之斯所以榮尊故鄉廟食舊國宜矣勒懿跡篆豐珉延光表美寧可闕歟光又策名清時亞位書府宦遊

日久遲暮言歸竊井邑之譽忝文章之目魯無君子
斯焉取斯以爲傳芳金石不可妄也郡司錄裴公導
翰林之寶辭推典麗請以頌記其銘此君爲之文曰
烈烈司徒爲王爪士勇冠諸軍義先州里三綱砥節
百行推美所謂伊人南國之紀天厭火德運歸黃祚
肇闢乾關未康國步鯨鯢振海獫狁交路偃草江干
惟夫子故矛鋌挺擊萬里長城旌旄血灑劍鐔風生
夸者貨首同焉盜明雄心不竭終古英靈依然甲第
尚想陳跡庭變金地祠開瑤席曰雨曰霽推誠邦伯
案咸淳昆陵志碑碣門云司徒神廟碑乾符三年集
賢院學士齊光又撰據此知碑原有年月名銜武進
縣志朱載無以補全也又案銘詞每段四韻而未
段跡席伯僅三韻亦不完蓋以下皆脫去矣

大唐威武軍節度福建管內觀察處置三司發
運等使特進揀校太保同中書門下平章事
使持節都督福州諸軍事兼福州刺史上柱
國琅邪郡王食邑四千戶食實封壹百戶王
審知德政碑銘

唐于兢

粵自範金合土之制雲師火紀之名禹別九州堯咨
四嶽莫不東求良輔宏濟兆人彰克勤克儉之能垂
可久可大之業嗣大叔寬猛之政循仲尼富庶之言
旣茂勲勞宜標篆刻公名審知姓王氏瑯琊人也其
胙土命氏疏源演派代濟其美史不絕書後以太祖
就祿光州因家於是郡焉曾祖友贈光祿卿王父蘊

王贈祕書少監父恁贈光州刺史繼贈太尉公即太尉之季子也初公兄潮志尚謙恭譽藹鄉曲善於和衆士多歸之福建節度使陳巖旣嚮其名又以所屬泉州求牧乃遣禮而請之及到任頗著嘉聲後巖在軍病甚不能視事軍士等懼無統御皆願有所依從泉牧遂以郡委於仲弟審邽而與公偕赴至則積惡者屏去爲善者獲安因詔授節度使累加檢校右僕射於是剋其訛弊整其章條三軍無譁萬姓有奉乾寧三年僕射遘疾且付公以戎旅仍具表奏尋加刑部尚書威武軍留後俄授金紫光祿大夫右僕射本軍節度使公器局端雅識理融明稟崧嶠之眞精得

圮橋之妙畧。及膺帝命。寵陟齋壇。細柳連營。旌旗動色。蒲盧蒞政。草樹逢春。一年而足。食足兵再。歲而知禮。知義。方隅之內。仰止攸同。曩以運屬艱虞。人罹昏墊。農夫釋耒。工女下機。公旣統藩垣。勵精爲理。強者抑而弱者撫。老者安而少者懷。使之以時。齊之以禮。故得汙萊盡闢。雞犬相聞。時和年豐。家給人足。版圖旣倍。井賦孔殷。處以由庚。取之盍徹。夫述職之道。底貢爲先。九丘爰序於厥苞。伍伯是徵於縮酒。雖旬服之近。江漢之中。或遇阻艱。亦絕輸賦。惟公益堅尊獎。慎守規程。松柏後凋。風雨如晦。地征旁午。天庫充盈。共仰勤劬。咸知匡戴。常以學校之設。是爲教化之原。

乃令誘掖童蒙興行敬讓幼已佩於師訓長皆寘於國庠俊造相望廉秀特盛閩川以南地惟設險人尚爭雄或因饑饉荐臻或以刻剝爲苦萑苻易聚巢穴難探公感之以恩綏之以德且曰吏寔爲虐爾復何辜示以寬仁俾之柔服遂使數十年之氛祲遽致廓清一千里之封疆旋觀昭泰張綱以單車入壘虞詡用絳縷擒姦以古況今彼猶懷愧爰自天寶艱難之後經費實繁聚斂之臣名額滋廣卽山鳩利任土庀財峻設隄防頗聞賙贍洎纏烽燧仍患崎嶇三司之職務空存四海之輪蹄鮮至公按其程課令以權衡盡叶舊規尤彰宏業而又奉大雄之教崇上善之因

象法重興導師如在虹梁雕拱重新忉利之宮鈿軸
牙籤更演毘尼之藏而又盛興寶塔多捨淨財日麗
飛甍霞攢彩檻頽豔迴向遠邇歸依用俾羣緣皆同
妙果佛齊國雖同臨照靡襲冠裳舟車罕通琛賁罔
獻者亦逾滄海來集鴻臚此乃公示以中孚致其
內附雖云異類亦慕華風宛土龍媒寧獨稱於往史
條支雀卵諒可繼於前聞自燎熾西秦烟飛東觀魯
壁之遺編莫掇周陵之墜簡寧存亟命訪尋精於繕
寫遠貢劉歆之閣不假陳農之求次第籤題森羅卷
軸夫四鄰共守蓋當偃草之期七德方修必假禦衝
之備是以恢張制度固護基扃程功而莫匪子來作

事而適當農隙立崇墉之百雉表巨屏於一方巖邑
湯池曾何足數折筯縈帶固不可憑未若暫勞致茲
永逸兵戈荐起帑庾多虛凡列土壘悉重征稅商旅
以之而壅滯工賈以之而殫貧公則盡去繁苛縱其
交易關譏鄽市匪絕往來衡麓舟鮫皆除守禦故得
填郊溢郭擊轂摩肩竟敦廉讓之風驟覩樂康之俗
閩越之境江海通津帆檣蕩漾以隨波篙楫崩騰而
激水途經巨浸山號黃崎怪石驚濤覆舟害物公乃
具馨香黍稷薦祀神祇有感必通其應如響祭罷一
夕震雷暴雨若有冥助達旦則移其艱險別注平流
雖畫鷁爭馳而長鯨弭浪遠近聞而異之優詔獎飾

乃以公之德化所及。賜名其水爲甘棠港。神曰顯靈侯。與夫召神人以鞭石。駢力士以鑿山。不同年而語矣。於戲。辨貞金於大冶。認勁草於疾風。不有良臣。誰康澤國。尋就加平章事。檢校右僕射如故。腰懸相印。手握兵符。益壯軍聲。弥新殊渥。又改光祿大夫。檢校司空。轉特進。檢校司徒。然而物議興。詞功厚。賞薄。以爲爵祿未稱。疇庸於是。異姓分封。仍加井邑。轉檢校太保。瑯琊郡王。食邑四千戶。食實封壹百戶。公之仲兄審邽。自守泉郡。一紀於茲。黠馬皆調。疲人盡泰。公性惟雍睦。氣稟溫。和。韻契墳簞。政侔魯衛。可謂高明。輝映超絕。一時者也。公以天下兵馬元帥。太尉。中書。

令梁王勲格穹昊德服華夷奉大國之歡盟爲列藩
之表率今節度都押衙程贊及軍州將吏百姓耆老
等久懷化育願紀功庸列狀上聞請議刊勒元帥梁
王以公如河誓著匪石情堅累貢表章顯陳保證朝
廷冀宏誘勸特示褒揚將建龜趺合徵鴻藻兢謬居
清列曾乏雄文頃歲常詠皇華往宣宸旨已於視聽
親飮徽猷今之執簡濡毫得以研精覃思備陳懿績
實無媿詞乃作銘曰

日月麗天舟楫濟川內外克乂股肱惟賢淮水長清
緱嶺方寧慶隨祚遠材爲時生伯氏雄特泉人仰德
求瘼斯勤頒條有則冠軍被疾付以師律政教翕張

士庶寧謐。懿彼閩越。帥實英傑。地列周封。心馳魏闕。
聖澤汪洋。元戎啓行。有典有則。爲龍爲光。高懸秦鏡。
理道自靜。比屋懷仁。連營稟令。航海梯山。貢奉循環。
務其輸委。毋憚險艱。周征之術。公田什一。約以有程。
守而勿失。輕徭薄賦。謳歌載路。高掩龔黃。遐追召杜。
鄉校皆遊。童蒙來求。雅道靡靡。儒風優優。惟虺吹毒。
久依山谷。罔恣陸梁。竟忻柔服。法寶梵宇。勝因所主。
崇構斯精。福慶攸聚。佛齊之國。綏之以德。架浪自東。
驅山拱北。墜簡遺編。繕寫精研。麟臺矗爾。武觀森然。
畚鍤其勤。雉堞連雲。永制尔敵。用壯我軍。關譏不稅。
水陸無滯。遐邇懷來。商旅相繼。黃崎之勞。神改驚濤。

役靈祇力保千萬艘劉驥荀龍填箠雍雍惟邦維翰
以侯以公元帥梁王武步龍驤挺彼七德削平四方
公能事大推心斯在風雨無渝歲寒不改殊勛茂績
盡瘁宣力國之丹青邦之柱石位冠台鼎任隆兵柄
重以徽章寵分異姓優詔銘功萬古英風貞珉是勒
垂之無窮
天祐三年丙寅歲閏十二月一日准
勅建銀青光祿大夫行尚書禮部侍郎上柱國臣于
兢奉勅撰將仕郎前守京兆府鄠縣尉直_宏文館王
倜書

唐儒林郎試大理評事行幽都府路縣令邊府
君墓誌銘

唐邊魯

惟丙戌之歲仲商之月又十六日嗚呼我先伯父長官遭疾傾殂於故里以其月二十四日攢塗於正寢欲詢逾月之制得以送終繼逢逐鹿之秋未遑安厝縣聯歲序可得而知粵有朝議郎試大理評事前行鄭州鄭縣令兼侍御史賜緋魚袋慎奇光祿大夫守刑部尚書行御史中丞上柱國陳留縣開國伯食邑一千五百戶歸讜即長官之弟姪也念深同氣痛切嚴書因感義於鵲鴒遂撫心於霜露特齎餘俸卜葬先靈乃謂諸姪孫曰方今海宇謐寧三農告隙俾營遠日之禮貴就叶龜之吉若非刊勒莫紀聲容其所誌銘汝當論撰罔遺其善弗虛其美魯仰奉明誨難

愧匪詞追往質今對揚實錄謹敘長官姓邊諱敏字德成其先陳留人也本枝百世代不乏賢或魚符而列職或墨綬以聯芳王父諱行存順州司馬神情磊落閒氣深沉抱環偉之奇才蘊中和之至德妥鍾厥後實曰俊明烈考諱承遇任上令孝治承家溫公秉性蒞事每勤於夙夜臨民恒示於愛威而教彼子孫備有趨庭之訓敬其祖禰必勤薦享之儀先妣太夫人太原郡王氏天資益秀婦道彌芳含茲淑善之風終啓繁昌之允恭惟長官英資倜儻偉量恢宏辭才則賈馬無稱孝敬乃曾顏讓美當未登顯仕恒奉溫清見喜色以問安露憂容而侍疾身能禮樂性存典

墳爰從赴聘於招弓。便可分榮於宰字。擢爲高陽縣令。蒞政之後。嘉問允彰。單父臨民。綽有七絲之詠。中牟作宰。不無三異之稱。及罷任之初。未及踰載。而除官路。縣復起頌聲。屏宣卧虎之威。廳集巢鳩之美。立言必雅。莫常顯己所長。用意絕私。未可屈人之短。大小之物。罔不躬決。聞望俱高。位祿已重。賦潘岳閑居之詠。起陶潛歸去之思。因罷厥官。却訪田里。豈謂景福未終。昊天不佑。碧落之孤雲易失。風窓之短焰難停。歷任三十年。享壽五十八。我伯母平昌郡孟氏。亦以不登遐壽。奄逝流光。貞魂諒合於延平。青骨同安於蒿里。有子四人。長日照。故幽都府永清縣令。松筠

定操金玉溫身方傳襲慶之榮俄邁涉洹之夢次日
隱前攝鄭州長史仁義兼資溫恭有譽守其祭祀不
怠厥初次日延徒以積慶韞光未趨顯仕而沒幼子
商裔運州左都押衙以職居鄉外身列陪臣空深怙
恃之悲莫奉松楸之禮孫子六人讓能去非光又霸
孫嵐孫天留並謙沖立志詩禮飭身咸懷踵慶之風
大有興宗之譽孫女三人義姐王師小姐或訖有絲
蘿或年才齠齔克著雍容之德允貞順之規於戲
生而無過歿而有後者其爲長幼乃梁鄧之贈弔
不歌春杵不鳴歸墟也連車乃梁鄧之贈弔
有則金張之系以庚申年十一月廿四日安神於

任丘縣長丘鄉孝慈里靖隧先墳之次禮也靈輅駕
野丹旒懸空爰開烏兆之塋實掩賢英之墓恭承日
照嚴旨謹作銘云

博哉貴胄踵慶於門山河其度金玉其身蘊十善道
爲百里君立功於國流愛於民豈期遘禍一旦歸魂
委宅幽壤慮謝音塵爰刊琬琰紀錄其勤日往月來
兮良銘此地付子孫兮傳揚萬春

此誌不書時代錄
附唐末以俟再考

晉故竭誠匡定保乂功臣特進檢校太保右金

吾衛上將軍兼御史大夫上柱國長沙郡開

國公食邑一千八百戶食實封一百戶贈太

傅羅公墓誌銘并序

五代殷鵬

夫天地肅物松柏猶或後凋郊藪呈芳芝蘭焉能長
秀故老氏有必摧之歎仲尼興不實之悲衆木低而
梁棟傾嚴霜重而祥瑞去物之有矣可得喻焉公諱
周敬字尚素其先顓頊之允也封於羅以國爲氏地
連長沙因家焉公即長沙之後也曾祖讓皇檢校司
空累贈太師封南陽王娶宋氏封越國太夫人祖諱
宏信皇天雄軍節度使檢校太師兼中書令長沙王
累贈守太師累封趙王諡曰莊肅娶趙國夫人呂氏
先薨又娶吳國夫人王氏爲時之瑞命世而生倜儻
不羣英雄自許有唐之末大盜勃興鎮守一方廓清
千里上則忠於社稷下則施及子孫烈考諱紹威皇

天雄軍節度使守太師兼中書令鄴王贈守尚書令
諡曰貞莊。天地鍾秀，山河孕靈。下筆則泉湧其文，橫
戈則雷震其武。惠惟及物，明可照奸。曠古已來，罕有
其比。貞莊有子四人：長廷規，天雄軍節度副大使、檢
校太傅、駙馬都尉；少薨，贈侍中。次周翰，義成軍節度
使、檢校太傅、駙馬都尉，亦少薨，贈侍中。次周允，前保
大軍行軍司馬、檢校兵部郎中，兼御史大夫，柱國，賜
紫金魚袋。早歷通班，繼爲上介。綽有器業，可奉箕裘。
公即貞莊公第三子也。性稟淳和，生知禮樂。早失天
廕，幼奉母儀。秦國夫人劉氏，即故兗州節度使太師
公之弟三女也。肅雍無比，柔順有聞。示以愛慈，加之

訓導遂令諸子悉著美名時梁乾化初公之次兄方鎮南燕公時年九歲秦國夫人歸寧於兗州太師之宅遂命侍行至闕下梁末主宣召入內對敷明庭進退有度上甚器重之遂授檢校尚書禮部員外郎仍賜紫金魚袋自此恒在宮禁出入扈從乘輿與皇親無閒待立冕旒多備顧問無非辯對深怡宸衷上尤奇之其年秋七月歸南燕甲戌秋七月公之次兄薨於滑州之公府上聞計奏乃謂近臣曰羅氏大勲之後宜賞延遂命公權知滑州軍州事檢校禮部尚書冬十月上表乞入覲十一月至京師朝謝畢翌日有制授宣義軍節度使檢校尚書右僕射年方十歲位

冠五侯。甘羅佩印之初，未爲少達。王儉登壇之日，已
是老成。十二月，至自京師。乙亥春二月，鄴中搆亂，河
上屯兵，泥處要衝，屬茲征伐，事無巨細，公必躬親，道
路有頌聲。軍民無撓政。丙子春二月，移鎮許田，加檢
校尚書左僕射。是歲，公年始十二，作事可法，好謀而
成，政絕煩苛。人臻富壽。忽下徵黃之詔，俄諧會尸之
期。戊寅秋七月，朝于京師。有詔尚主。公拜表數四，辭
不獲免，遂授檢校司空，守殿中監，駙馬都尉。壬午冬
十月，出降。普安公主傅粉何郎，晨趨月殿，吹簫秦女，
夜渡星橋。一時之盛事，難儔千古之清風。盡在癸未
春三月。除光祿卿。冬十月，唐莊宗收復梁園，中興唐

祚屬當郊祀無失職司遂封開國侯加食邑三百戶至明宗纂紹之初除右金吾衛大將軍充街使秋九月轉左金吾衛大將軍充街使執金在彤庭之前佩玉向丹墀之上仕宦之貴無出於斯上以公久居環衛之班頗著警巡之効至戊子二月有制授匡國軍節度使加檢校司徒仍賜耀忠匡定保節功臣下車之後布政惟新福星爰照於左馮暖律又來於沙苑庚寅夏四月上以圓丘禮畢慶澤溥行就加檢校太保仍降璽書其年冬十一月朝于京師除左監門衛上將軍九月轉左領衛上將軍辛卯夏六月轉左武衛上將軍癸巳五月除左羽林統軍甲午春加特進

階封開國公食邑二百戶改賜竭誠匡定保乂功臣
丙申九月唐廢主以汴師北征命公以所部禁旅巡
警夷門公英斷不回至仁有勇當危疑之際立鎮靜
之功浚郊之民于今受賜今皇帝并門鳳舉洛水龍
飛力願推崇首來入覲上嘉其懿効旌彼殊庸遂除
右金吾上將軍美哉出揔藩宣入居嚴衛外則作疲
民之藥石內則爲天子之爪牙文武兩班踐揚將遍
物禁太盛古之有言壽年未高染疾不起以天福二
年七月二十七日薨於汴州道德坊之私第享年三
十有三嗚呼皇天莫問徒云輔德之言大夜何長共
有殲良之歎上聞所奏惻怛哀慟輟視朝兩日厚加

賜幣贈太傅君臣之義終始克全公以己丑歲五月
梁普安公主薨於同州後再娶東海郡徐氏夫人即
故東川節度使太師弟五女也蕙質蘭姿懿德令範
孰念孤鸞之歎自傷黃鵠之歌公有姪延見任閑
廐副使即魏博副大將軍侍中之子也朴玉其儀渾
金其器度相貌人欽公
亦三子四女長子延賞守太子舍人次延緒次延宗
皆稟庭訓悉紹家聲龍駒鳳雛得非天性良金瑞玉
自是國楨終天懷風樹之悲踣地有蓼莪之痛長女
適郝氏次適婁氏二女方幼諸子皆普安公主之出
也公主靜惟閑雅動有規儀休聲首冠於皇親淑德

克彰於婦道。帝王之女。無以過焉。公性不好弄。幼善屬文。嚴毅而至和。溫恭而難犯。言惟合道。動不違仁。張充一變之年。已功成名遂。潘岳二毛之日。乃善始令終。以丁酉歲冬十月六日。安葬於洛陽縣之原。禮也。孤子延賞等泣告鵬曰。公之履行。爲衆所知。公之勲庸。歷代罕比。若非故舊。孰能縷陳。鵬列親表之間。受顧念尤最。難避狂簡。輒勒貞珉。序不盡言。乃爲銘曰。

積慶之門。挺生奇傑。入覲堯庭。出持漢節。十乘啓行。萬夫觀政。宵旰無憂。袴襦入詠。英華發外。清明在躬。惟忠惟孝。立事立功。滑臺去思。璧田來暮。藹然休光。

綽有餘裕。摘繡文翰。傅粉容儀。承顏紫禁。飛步丹墀。門盛七葉。祿逾萬石。外冠時英。內光帝戚。歷事累朝。薦逢多難。動有成功。舉無遺算。秋敗芳蘭。地埋良玉。山雲晚愁。林風夜哭。王孫一去。今不復還。陵園草色。今秋黃春綠。

朝議大夫行起居郎充史館修撰

柱國殷鵬撰并書

羅周敬傳見薛居正五代史宗九十一

紹之初除右金吾衛大將軍充街使則薛史歐史俱稱歷左右金吾衛大將軍在莊宗時誤也

臨卽教授程伯剛墓誌銘

宋劉光祖

吾友程公說字伯剛眉之丹稜人居於敘之宣化伯剛靜而文方教授臨卽官滿成都臺府爭辟舉之聞

逆曦以屬叛毀車馬棄衣冠即日逃歸入門而號以
白其父其父與宣化令始知之相與驚憤不能食伯
剛白有司乞休官侍親入深山若將避世者對客輒
流涕其弟公碩字仲遜時分教益冒艱危中誓不辱
賊賊平而伯剛以積憂傷且方奔避時失食飲節忽
忽病醫誤投之藥汗不止遂死開禧三年三月二十
二日也年三十有七仲遜丐檄走哭喪次與其父相
向慟已而父收涕語曰若兄之未生也吾夜夢立門
外一青衿童子挽吾衣曰我爲公嗣問其所從來則
曰我青神先生兒也明年而若兄生長而父師不煩
於教當此變亂與汝隔不相聞若兄入縣西北安固

山爲終焉計。不復問家事。但攜所著春秋諸書。以自隨。謂諸弟曰。我嘗遊青城。大面諸山。徘徊不忍去。去之三年。日往來於懷也。今此山遠城市。茂草木。吾心有感焉。語未旣。泣數行下。曰。妖氣未除。世路艱棘。吾欲從此逝矣。疾革。父母問所欲言。無他語。但云。仙階淺。未足以成功名。荅其弟。其子亦然。殮之夕。從弟仲藝夢若兄言。我故青城山人也。吾父乃以爲眉之青神。宜爲我一正其誤。先是。汝兄方之少城。出門連夕。雪。汝弟公辰夢一黃衣。告以兄所辟兩闕俱非。當授青城山見次。哀哉。數事如合券。吾兒之生死如此。復相向慟失聲。其卒之明年。嘉定元年十月乙酉。葬之。

於縣西馬泉山之原。仲遜授學於伯剛。伯剛與仲遜同年舉進士。旣仕矣。俱以所學。孳孳質於余。伯剛骨秀而神清。尤積學苦志。平生於春秋一書。究之反覆不厭。有春秋分記九十卷。左氏始終三十六卷。通例二十卷。比事十卷。勤矣哉。而未嘗止也。又取諸儒講解鉤纂之名。曰精義。病中猶不去手。書未及成而卒。伯剛性恬潔。居無惰容。得伊洛諸書。服膺焉。不臻其極不已。有語錄二卷。士訓一卷。詩文二十卷。程氏大宗譜十二卷。此其爲志何如也。自伯剛率諸弟以學。連二舉。兄弟同薦者五人。伯剛凡兩薦登科。時年二十有五。旣與其弟各調官待次。杜門潛心。人罕識其

面曰它日欲求此樂不可得也。及試吏廣都簿。遇事人服其公清。部使者傅寺丞使代老令。理其縣。吏不敢侮。邛州號多士。伯剛掌教不肯苟。不使郡太守奪其職。宇文侯下車。始得以經訓古道從事。士風遂振。鄉長老李德秀盛稱之。凡號端方士。皆深知伯剛。伯剛則行其所學。非苟求知者也。不幸蚤世。以通直郎賁其終。伯剛之父名符孫。蓄學不售。祖諱志行。少豪於才。以承信郎鎖其廳。薦居詞賦首。曾祖諱準。兩貢辟廱。有聲六世。祖自汴歸蜀。愛郁郅山川而居焉。今宣化是也。伯剛之母魚耶孫氏。有賢德。妻健爲王氏女也。二子長曰元子。前伯剛七年卒。次曰光老。女曰

寧前一月卒。次曰嘉伯剛之葬也。仲遜無以塞其父之悲。乃來請銘。銘曰。

祠西之峯。有翩其童。暫下人世。今還山無蹤。曷不少俟。以遊夫蓬萊道山之宮。曰吾未足以成功也。獨留遺冢與遺書。使思子兮無窮。我爲勒銘。識其幽封。月明山空。魂其歸來。蕭蕭松風已矣乎。聊託吾文。慰而翁。無索之於杳冥之中。春秋分紀勝近人大事表遠

又無好事者刊刻單行今錄載公說墓誌使世閒知此書庶幾終傳於後尔

續古文苑卷第十九

續古文苑卷第二十

賜進士及第授通奉大夫山東通省督糧道加三級孫星衍撰
誄

大司馬吳漢誄

漢杜篤

篤以爲堯隆稷契舜嘉皇陶伊尹佐殷呂尚翼周若
此五臣功無與疇今漢吳公追而六之乃作誄曰
朝失鯁臣國喪爪牙天子愍悼中宮咨嗟四方殘暴
公不征茲征茲海內公其攸平泯泯羣黎賴公以寧
勲業旣崇持盈守虛功成即退挹而損諸死而不朽
名勒丹書功著金石與日月俱案此蓋未全故
征茲句不協韻

和帝誄

漢蘇順

天王徂登率土奄傷如何昊穹奪我聖皇恩德累代
乃作銘章其辭曰

恭惟大行配天建德陶元二化風流萬國立我蒸民
宜此儀則厥初生民三五作綱載藉之盛著於虞唐
恭惟大行爰同其光自昔何爲欽明允塞恭惟大行
天覆地載無爲而治冠斯往代往代崎嶇諸夏擅命
爰茲發號民樂其政奄有萬國民臣咸秩大孝備矣
閔宮有恤由昔姜嫄祖妣之室本枝百世神契惟一
彌留不豫道揚末命勞謙有終實惟其性衣不制新
犀玉遠屏履和而行威稜上古洪澤滂流茂化沾溥
不慙少留民斯何怙歔歔成雲涕泣成雨昊天不弔

喪我慈父

萬年公主誄

晉左九嬪

昔蒲衣早智周晉夙成咸以岐嶷名存典經猗歟公主
主在幼尅哲方德比齒有邈先烈何德之盛而年或
闕何華之繁而實不結雨墜風逝形影長滅赫赫京
室河洛所經陰精發曜降茲淑靈篤生公主誕膺休
禎秀生紫微日暉月明紅顏鬢髮金質玉形太平御覽一百五十四引補既睇艷姿徽音孔昭盼倩其媚婉曼其嬌
寵玩軒陛如瓊如瑤雖則弱齒雙德兼苞五福所集
聞之先民積善鍾慶祐德輔仁宜終淑美光暉日新
云何降戾景命不振曄曄榮曜英蕤始芳何辜于天

猥遇降霜。熒熒稚魂。飄飄遐翔。於戲何辜。痛茲不福。
生而何晚。歿而何速。酷矣皇靈。謬哉司祿。嗚呼哀哉。
日月載馳。白露凝結。自主薨徂。奄離時節。吉凶乖邈。
存亡異制。將遷幽都。潛神永翳。嗚呼公主。魂豈是綏。
岌岌靈輜。駿駟駢駢。挽僮齊唱。悲音激摧。士女獻欵。
高風增哀。一日不見。採蕭作歌。況我公主。形滅體訛。
精靈遷逝。幽此中阿。言思言念。涕淚滂沱。嗚呼哀哉。

弔文

哀詞

弔張衡文

漢 禰衡

衡

南岳有精。君誕其姿。清河有理。君達其機。故能下筆。
辭繡。揚手文飛。昔伊尹值湯。呂尚遇旦。嗟矣君生。而

獨值漢蒼蠅爭飛鳳凰已散元龜可羈河龍可絆石
堅而朽星華而滅唯道興隆悠永靡絕君
音永浮河水有竭君聲永流周旦先沒發夢孔丘余
生雖後身亦存遊士殞知己君其勿憂

弔夷齊文

魏縻 元

少承洪烈從戎於王側聞先生餓於首陽敢不敬弔
寄之山岡嗚呼哀哉夫五德更運天秩靡常如有絕
代之主必有受命之王故堯德終于虞舜禹祚殄于
成湯且夏后之末祀亦殷氏之所亡若周武爲有失
則帝乙亦有傷子不弃殷而餓死何獨背周而深藏
是識春香之爲馥而不知秋蘭之亦芳也

二句御覽無

所

在誰路而子絕之首陽誰山而子匿之彼薇誰菜而子食之行周之道藏周之林讀周之書彈周之琴飲周之水食周之芥而謗周之主謂周之淫是誦聖之文聽聖之音居聖之世而異聖之心嗟乎二子何痛之深

二句御覽無○梁隋書經籍志梁有散騎常侍庾元集五卷亡

溧陽侯陶謙哀詞

吳張昭

猗歟使君君侯將軍膺秉懿德允武允文體足剛直守以溫仁令舒及廬遺愛於民牧幽暨徐甘棠是均憬憬夷貊賴侯以清蠹蠹妖寇匪侯不寧唯帝念績爵命以章既牧且侯啓土溧陽遂升上將受號安東將平世難社稷是崇降年不永奄忽殂薨喪覆失恃

民知困窮曾不旬日五郡潰崩哀我人斯將誰仰憑
追思靡及仰叫皇穹嗚呼哀哉建康志溧陽侯陶謙墓在溧陽考證云後漢獻帝與平元年溧陽侯陶謙卒且葬張昭哀之其詞曰云云

晉成帝哀策文

宸極寥廓聖靈遐之哀備物之虛在痛永往之無期
乃命史官述德寄辭其辭曰

五德代興素靈啓曜離光疊暉三辰重照明明我皇
含貞挺妙元秀夙達履德罔違鳳棲遐邈神宇凝夷
文明外潤仁簡內綏舉無遺中鑒無幽微韻隆汾陽
道侔垂拱靜恭清穆冥功日用亹亹神軌同天攸縱
爰有陽九紀綱中替姦豎肆逆牢羅失衛外降艱難

協應神契靈祚旣保顯揚天命雰霧朝晞兩儀開鏡
訓諮阿衡虛己絕正九功潛流七德將表方振宏羅
稜威電掃芟蕩神衢一我王道昊天不弔降茲大悔
天傾其儀地覆其載大業未究神爽遷背哀貫三靈
痛流萬代爰初不豫大漸在躬啓手歸全神氣夷沖
凝哉達識體正履終衮龍旣襲玉容斯幽登醪虛設
觴爵靡酬墳牘莫啓聖迹誰修冥冥我皇神焉何遊
撫膺遐叫迸涕交流三筮告期將歸陵墟陞殞羽翼
庭納龍輿玉輪動運錫鸞鳴衢錫旆徘徊六驥踟躕
輕雲蔭舉流風翼車哀哀同軌唯唯輓夫長號永慕
泣涕漣洳大塊獨運終歸其始我后永往寧神于祀

悠悠上天。煢煢惟已。渺然靡憑。廓焉無恃。目範令儀。徽音在耳。

晉孝武帝哀策文

晉王 恂

同軌畢至。百司胥亞。法物夕陳。輶輳夙駕。親執饋奠。長號永夜。懼鼓刻之遄盡。哀良辰之莫借。悲宮宇之寥廓。痛聖儀之幽化。夫至德無名。固理絕稱。謂然祝史陳辭。亦臣子所貴。寄窮情於翰墨。庶遺塵之髣髴。其辭曰。

惟皇作極。五德迭允。康實復夏。武亦隆晉。疊疊太宗。希夷其韻。鏡之者元。撫之者順。於穆皇考。嗣徽絕軌。前聖後哲。契合一揆。心去其伐。行遺其美。廢華任誠。

捨荃存旨。惟深通志。羣方咸秩。惟幾成務。能事斯畢。
未若我皇。至則不疾。恢恢天網。䟽而莫失。居有以虛。
宰多以少。簡則可從。靜則不擾。信及豚魚。澤被億兆。
湛然司契。坐一八表。園陵旣衛。威靈赫赫。子來旣構。
寢廟奕奕。武曰止戈。戎不極役。文教聿修。有恥且格。
迹有遠邇。感無高深。道之所被。改色革音。皓獸馴苑。
素羽棲林。殊柯通理。異蒂同根。方融元液。陶鑄斯民。
雲韶候奏。比屋思淳。積祐莫應。天罰奄臻。太山頽構。
洪瀆竭津。何殃之甚。何酷之殷。自罹旻凶。二氣代變。
霜繁廣除。風迴高殿。帷幙空張。肴俎虛薦。極聽無聞。
詳視罔見。人神道殊。吉凶有禮。龜筮參謀。埏隧告啓。

史臣考古警者在陞攀援忪忪惟兄及弟龍興肅以
引邁前驪紛以抗旒城闕儼以整列馳道亘以通修
悲平昔之所幸豈斯路之復由輓哀唱以翼衡駟悲
鳴而顧輶違華宇之晰晰即永夜之悠悠奉靈輿而
長訣緬終天而莫收訴穹蒼以叫踊洞五內其若抽
儻性命之可贖甘人百於山上茫茫大運靡始不終
哲王遺世貴在道融昭哉我皇萬代流風良史式述
德音永隆

弔嵇中散文

晉李充

先生挺邈世之風資高明之質神蕭蕭以宏遠志落
落以遐逸忘尊榮於華堂恬卑靜於蓬室寧漆園之

逍遙安柱下之得一寄欣孤松取樂竹林尚想榮莊
聊與抽簪味孤觴之濁醪鳴七絃之清琴慕義人於
元旨詠千載之徽音凌晨風而長嘯託歸流而永吟
乃自足於丘壑孰有愠乎陸沉馬樂原而翹足龜悅
塗而曳尾疇廟堂之是榮豈和鈞之足視凡先生之
所期羌元達於遐旨尚遺大以出生何殉小而入死
嗟乎先生逢時命之不下冀後凋於歲寒遭繁霜而
夏零滅皎皎之玉質絕琅琅之金聲援明珠以彈雀
損所重而爲輕諒鄙心之不爽非大雅之所營

弔比干文

後魏孝文帝

唯皇構遷中之元載歲御次乎閹茂望舒會於星紀

十有四日。日唯甲申。予揚和淇右。蹠駟廊西。指崧原
而搖步。順京途。以啟征。路歷商區。輅屆衛壤。泛目睇
川。縱覽觀陸。遂傍睨古跡。游瞰曩風。覩殷比干之墓。
悵然悼懷。葉讀當於此字句絲焉。乃命馭駐輪。笑驥躬矚。荆棘
棘荒朽。工爲繇蕤。張而遺猷。明密事若對德。慨狂后
之猖穢。傷貞臣之婞節。聊興其韻。貽弔云爾。 曰
三才之戲元亨。敷五靈以扶德。含剛柔於金木。資
明闇於南北。重離耀其炎暉。兮。曾坎司元以秉黑。伊
稟常之懷生兮。昏睿遞其啟則。晝皎皎其何朗兮。夜
幽幽而致弊。哲人昭昭而澄光兮。狂夫黜黜其若翳。
咨堯舜之耿介兮。何桀紂之猖敗。沈湎而不知甲兮。

終或臧己以貽戾。蹇蹇兮比干。藉冑兮殷宗。含精兮
誕粹。寘樹兮英風。粟蘭露以滌神。食藥菊英而儼容。
茹薜荔以蕩識。佩江離而麗躬。履霜以結冰兮。卒窘
忠而弥濃。千金豈其吾珍兮。皇輦寔余所鍾。舊誠諫
而燼軀兮。導危言以釁鋒。嗚呼哀哉。嗚呼哀哉。惟子
在殷。實爲樑棟。外贊九功。內徽辰共。匡率袞職。德音
遐洞。周師還旆。非子誰貢。否哉悖運。邁此不辰。三綱
道沒。七曜輝泯。負乘竊器。怠棄天倫。懷誠齎怒。讜言
爲陳。毘侯已醢。子不見歟。邢侯已脯。子不聞歟。微子
去矣。子不知歟。箕子奴矣。子不覺歟。何其輕生。一致
斯歟。何其愛義。勇若歸歟。遺體旣灰。不其惜歟。永矣

無返不其痛歟。嗚呼哀哉。嗚呼哀哉。夫天地之長遠
兮。嗟人生短促多殃。住往者子弗及兮。來者子不願
。當胡契濶之屯。亶兮。值昏化而永良。曷不相時以
卷舒兮。徒委質而巔顛。雖虛名空傳於千載。詎何
勲之可揚。奚若騰颺以遠逝。飛足而歸昌。得比肩於
尚父。卒同協於周王。建鴻績於盛辰。啟肯宇於齊方。
聞穆音乎万祀。傳冤親業以脩長。而乃自受茲斃。視
竅殷系。辨剖心無補。迷機喪身。脫非武發。封墓誰因。
嗚呼介士。胡不我臣。
重曰。世惛惛而溷濁兮。日
謁謁其無光。時坎廩而險隘兮。氣懔懔以飛霜。子奚
其不遠逝兮。侘傺而吐故鄉。可乘梓梓以浮滄兮。求

蓬萊而爲蜚銜芝條以昇虛兮與赤松而翱翔被芰
荷之輕衣兮電戟扶容之菡裳循海波而澍颺兮望
會稽以歸禹紐蕙芷以爲紳兮扈荃佩而容与寫薜
結於聖人兮暢中心之祕語執垂益而談卡辨兮交
良朋而憶據字金石文字
記釋作慮非苦言旣而東騰兮吸朝霞
而長舉登岵巘而悵望兮眺扶桑以停佇謁靈威以
問路兮乘谷風而扳宇遂假載於羲和兮憑六螭以
南處翥衡嶽而顧步兮濯沅湘以自潔嚼炎州之八
桂兮踐九疑而遙襲即蒼梧而宗舜兮拂埃霧以就
列採輕越而肅帶兮切寶犀以貫介訢辯淳風之淪
覆兮話蕭韶之湮滅召熊羆而叙釋兮問重華之風

桀余乃飲正陽之精氣兮遊丹丘而明視捐捐祝融
而求鳥兮。御朱鸞以脩指。因景風而凌天兮。迴靈鷲
鷲以西履。降黃渚而造稷兮。慰稼穡之艱難。訪有邰
之詵詵兮。遇何主而獲安。然後陟崑崙之翠嶺兮。擘
瓊枝而槃桓。步懸圃以溜澆兮。咀玉英而折蘭。歷崦
嵫而一顧兮。府字沐髮於涌盤。仰從縱倚於閭闔兮。
請帝閭而啟關。天沈寥而廓落兮。地窅渺而遼闊。滄
淪陰以捭氣兮。佩瑤珥而鳴鏘。拜招矩而脩節兮。少
躊躇以相羊。祈騷驥而揔韁兮。隨泰風以颺揚。瞰不
周而左旋兮。縱神駟以北望。尋流沙而騁鑾轡兮。暨
陽周以緹駕。靡芸芳以馥體兮。索夷杜而桓衙。奉軒

轅而陳辭兮。申時俗之不暇。適岐伯而脩命兮。展力
牧以問霸。歛沆瀣之純粹兮。闢彌寒門之層氷。聆廣
莫之颺飄。瑟兮。覲黔羸而迴凝擁。元武以涉虛兮。瓦
神竄而威陵。象曖曖而晦鬱兮。途曷曷其難勝。笑飛
廉而前驅兮。使燭龍以輝澄。歸中樞而睎睨兮。想元
漠之已周。慨飛颺之無寄兮。颯翔袂而上浮。引雄虹
而登峻兮。揚雲旗以軒遊。躍八龍之蜿蜒兮。振玉鸞
之啾啾。攀彗星以朗導兮。委升軻乎大儀。教重暘之
帝宮兮。凝精魄於旋曦。扈陽曜而靈脩兮。豈傳說之
足竒。但至槩之不悛兮。寧溘死而不移。

告泰華府君文

唐韓 賞

惟廿七祀孟秋右補闕韓賞敢昭告于泰華府君祠
廟惟天地生于人惟山川主乎神人有識而神有靈
人貴聰而神貴明於昭靈山與天窈冥載在祀典鎮
于上京自古帝王徵應不一荒淫者神降之以聖哲
者神授之吉惟茲臣庶鑒乎得失今予小子造于神
祠將有所盟神其聽之人有嗜好各爲私禱顧無所
求唯道是憂今者內禱於身外盟於神如有一心公
朝戮力生人惟神是福崎嶇世道僊俛在位惟神所
殛必將忘身奉國爲本圖憂國濟人爲己任明明泰
華昭鑒于茲瞻彼牲牢抑惟常禮神嗜正直意存精
誠正直以享神精誠以享意拳然跼慮瞿然改容益

靈山之嵯峨增壽宮之肅穆歷階趨進髣髴其形尚
饗天寶元年歲次壬午四月乙亥朔十日甲申
正議大夫太僕少卿兼太山別駕鄒諸王侍書榮王
府司馬韓擇木書

祭文

釋奠祭孔子文

晉庾亮

維咸康三年荆豫州刺史都亭侯庾亮敬告孔聖明
靈詩書煥於唐虞憲章盛於文武然後黎民時雍彝
倫攸敘幽厲殲構玉繩絕紀高岸爲谷六合錯否上
凌夷而失教下苟免而無恥公以元聖之靈應感圓
通萬物我賴匪我求蒙夫子旣沒洪範垂流秦雖慢

道漢聿孔修。洎我皇晉。仰欽大猷。宗聖旣建。遐胄俾
侯。令月吉辰。祗陳大禮。磬管鏘鏘。威儀濟濟。嘉奠旣
設。欽若靈規。心存鳳德。尚想來儀。神其歆之。降鑒在
斯。

祭牙文

晉表 宏

天生五才。治道所司。廢一不可。靜亂輔時。赫赫晉德。
乃武乃文。中世不競。王度暫屯。戎狄猾夏。虔劉生民。
蠢爾東胡。被髮左袂。思我皇澤。稽首海表。受爵納貢。
服膺累世。後嗣不恭。實叛實戾。侵我神畿。隔我嘉惠。
哀彼黎民。嬰此彫殘。沉荷大寵。任其艱難。慨然發憤。
撫劍忘飡。敢建高牙。烈烈桓桓。

祭梁鴻文

晉周穎文

晉隆安四年陳郡周穎文以蘊藻行潦祠于梁先生之墓夫子邁志箕穎塵垢雕俗骨秀風霜性淳寡欲要待偕隱之儷文絕陪臣之錄遂負策周魯之郊逆旅吳會之阿可謂高奇絕倫孤生莫和者也後學撫牘得人在文忽以知命而展其墳茫茫積草有馥餘芬昔先生過延陵而想季經海隅而感連苟踐跡而趣合亦斷金於當年

祭夫文

梁徐悱妻劉氏

維梁大同五年新婦謹薦少牢於徐府君之靈曰惟君德爰禮智才兼文雅學比山成辯同河瀉明經

擢秀光朝振野調逸許中聲高洛下含潘度陸超終
邁賈二儀旣肇判合始分簡賢依德乃隸夫君外治
徒奉內佐無間幸移蓬性頗習蘭薰式傳琴瑟相酬
典墳輔仁難驗神情易促電碎春紅霜雕夏綠躬奉
正衮親觀啓足一見無期百身何贖嗚呼哀哉生死
雖殊情親猶一敢遵先好手調薑橘素俎空乾奠觴
徒溢昔奉齊眉異於今日從軍暫別且思樓中薄遊
未反尚比飛蓬如當此訣永痛無窮百年何幾泉穴
方同

祭陳伯玉文

唐盧藏用

子之生也珠圓流兮玉方潔子之沒也太山頽兮良

木折士林閒寂兮人物疎門館蕭條兮賓侶絕嘆佳
城之不返辭玉階而長別嗚呼置酒祭子子不顧沈
聲哭子子不迴唯天道而無託但撫心而已摧

雜文

用筆法

秦李斯

夫書之微妙道合自然篆籀以前不可得而聞矣自
上古作大篆頗行於世但爲古遠人多不詳今斯刪
畧繁者取其合理參爲小篆凡書非但裹結流快終
藉筆力輕健蒙將軍恬筆經猶自簡畧斯更修改望
益於用矣用筆法先急回後疾下鷹望鵬逝信之自
然不得重改如游魚得水景山興雲或卷或舒乍輕

乍重善思之此理可見矣

斯善書自趙高已下

咸見推伏刻諸名山碑璽銅人並斯之筆斯書秦望

紀功石云吾死後五百三十年閒當有一人替吾跡

焉一本作九百四十年

僮約

漢王褒

蜀郡王子淵以事到湔止寡婦楊惠舍惠有夫時奴
名便了子淵倩奴行酤酒便了拽大杖上夫冢巔曰
大夫買便了時但要守家不要爲他人男子酤酒子
淵大怒曰奴寧欲賣耶惠曰奴大忤人人無欲者子
淵即決買券云云案本誤不重今補奴復曰欲使皆上券不
上券便了不能爲也子淵曰諾券文曰神爵三年正

月十五日資中男子王子淵從成都安志里女子楊

惠買亡夫時戶下髯奴便了決賈萬五千奴當從百

役使不得有二三言晨起早掃食了洗滌居當穿白縛

箒裁孟鑿斗浚渠縛落鉏園斫陌紫向絕章樵誤以

知落陌杜埤音苑脾地刻大枷屈竹作杷削治鹿盧出

入不得騎馬載車跣坐大呶下床振頭捶紫本誤鉤

此字依藝刈芻結葦臘纊汲水此二字依酪佐此字

文類聚酢音苑祖音醖音摸織履作麤黏雀張烏結網捕魚繳

鴈彈鳧登山射鹿入水捕龜後園縱養鴈鷺百餘驅

逐鴝鳥持梢牧猪種薑養芋紫本誤長育豚駒糞除

堂廡此二字依餽食音苑伺馬牛鼓四起坐夜半益芻

二月春分被隄杜疆落桑皮梭御覽注云梭耕欄也

種瓜作苑昨音鑿瓠別茄披葱焚槎發芋御覽注云蜀土

收芋皆窖藏龍集破封日中早黃苑復音○案此字

之至春乃發引中無以訂之章樵本雞鳴起春調治馬戶兼落三

重御覽注云馬戶水門也蜀每以舍中有客提壺行

酤汲水作餠苑脯滌杯整按園中拔蒜斷蘇切脯築

肉臠芋膾魚魚鱉烹茶盡具已而此字依蓋藏關門

塞竇餽猪縱犬勿與鄰里爭鬪奴但當飯豆飲水不

得嗜酒欲飲美酒唯得染脣漬口不得傾盂覆斗不

得辰出夜入交關伴侶舍後有樹當裁作船上至江

州下到湔蓋不知船湔錢為韻主為府掾求用錢

推訪聖

聖御覽

聖白璫也云

販梭索繇亭買席往來都洛當為

婦女求脂澤販於小市歸都擔棗轉出旁蹉

御覽注云蹉市

名牽犬販鵝武都買茶

御覽注云武都縣名出茶

楊氏

案御覽亦

字今據

刪之

擔荷

御覽注云楊氏池名出荷

往來市聚慎護奸偷入市

不得夷蹲旁卧惡言醜罵多作刀矛持入益州貨易

羊牛

案本誤

奴自教精慧不得癡愚持斧入山斷輮

裁輮

御覽注云輮車輞也

若有餘殘當作俎几木屐及毬盤

注云毬盤

猪槽也

焚薪作炭

罪苑切

石薄岸

御覽注云岸也○案據注署當作累御覽亦謫累

音力也

案據注署

及初學記力罪切亦非

治舍蓋屋削

書

案本誤

伐牘日暮欲歸當送乾薪兩三束四月當

披九月當穫十月收豆

御覽注云十月民輸租

掄麥窖芋

御覽注云

掄麥種麥也南安拾栗採摘御覽注云南持車載輶御覽注云

載輶有利也○案已上正文十四字初學記脫去僅見御覽今據補多取蒲葶音益

作繩索雨墮無所為當編蔣織薄種植桃李梨柿拓

桑三丈一樹八樹此字依藝文類聚為行果類相從縱橫相

當果熟收斂不得吮嘗犬吠當起驚告鄰里振門柱

戶上樓擊鼓御覽注云漢時官不禁報怨民家皆高樓置鼓其上有急即上樓擊鼓以告邑里

令救荷初學記盾曳矛還落三周勤心疾作不得遨

遊奴老力索種莞織席事訖休息當舂一石夜半無

事浣衣當白若有私錢主給賓客奴不得有姦私事

事當關白奴不聽教當笞一百讀券文適訖詞窮詐

索乞乞叩頭兩手自搏目淚下落鼻涕長一尺審如

王大言不如早歸黃土陌丘蚓鑽額早知當爾爲
此字依藝文王大酤酒真不敢作惡
類聚初學記文王大酤酒真不敢作惡
初學記故大段全同開有一二小異而已
覽五百九十八亦載之雖非完篇然可依以訂補者
甚多又載有舊注尤足信據如云蜀土收芋皆窖藏
之至春乃發則知芋今作等之必誤矣
則知戶今作駟之必誤矣
之必誤矣
御覽正文皆未嘗誤也則知輟今作藥之必誤矣
御覽正文皆未嘗誤也則知輟今作藥之必誤矣
豈不陋哉其舊注未悉撰人名氏惜御覽載之不盡
乃就取所有兼采藝文類聚初學記亦附鄰見詳加
校定重載於此初學記古文苑皆言此文相傳多誤
垂已粗得通庶

難蓋天八事

漢揚雄

一曰日之東行循黃道晝中規牽牛距北極北百一
十度東井距北極南七十度并百八十度周三徑一

二十八宿周天當五百四十度。今三百六十度何也。
二曰春秋分之日正出在卯入在酉而晝漏五十刻。
即天蓋轉夜當倍晝。今夜亦五十刻何也。三曰日入
而星見日出而不見。即斗下見日六月不見日六月
北斗亦當見六月不見六月。今夜常見何也。四曰以
蓋圖視天河起斗而東入狼弧閒曲如輪。今視天河
直如繩何也。五曰周天二十八宿以蓋圖視天星見
者當少不見者當多。今見與不見等何出入無冬夏
而兩宿十四星常見不以日長短故見有多少何也。
六曰天至高也地至卑也日託天而旋可謂至高矣。
縱人目可奪水與景不可奪也。今從高山上以水望

日日出水下影上行何也七曰視物近則大遠則小
今日與北斗近我而小遠我而大何也八曰視蓋橈
與車輻閒近杠轂即密益遠益疎今北極爲天杠轂
二十八宿爲天橈輻以星度度天南方次地星閒當
數倍今交密何也文見隋書天文志云以通渾天張
錄之故

靈憲

漢張衡

昔在先王將步天路用定靈軌尋緒本元先準之於
渾體是爲正儀立度而皇極有道建也樞運有道稽
也乃建乃稽斯經天常聖人無心因茲以生心故靈
憲作興曰太素之前幽清元靜寂漠冥默不可爲象

厥中惟虛。厥外惟無。如是者永久焉。斯謂溟滓。蓋乃道之根也。道根既建。自無生有。太素始萌。萌而未兆。并氣同色。渾沌不分。故道志之言云。有物渾成。先天地生。其氣體固未可得而形。其遲速固未可得而紀也。如是者又永久焉。斯謂龐鴻。蓋乃道之幹也。道幹既有育物成體。於是元氣剖判。剛柔始分。清濁異位。天成於外。地定於內。天體於陽。故圓以動。地體於陰。故平以靜。動以行施。靜以合化。堙鬱構精。時育庶類。斯謂天元。蓋乃道之實也。在天成象。在地成形。天有九位。地有九域。天有三辰。地有三形。有象可效。有形可度。情性萬殊。旁通感薄。自然相生。莫之能紀。於是

人之精者作聖實始紀綱而經緯之八極之維徑二
億三萬二千三百里南北則短減千里東西則廣增
千里自地至天御覽二引有一億一萬六千五百一十里在此下半於八極
則地之深亦如之通而度之則是渾已將覆其數用
重差鉤股懸天之景薄地之儀皆移千里而差一寸
得之過此而往者未之或知也未之或知者宇宙之
謂也宇之表無極宙之端無窮天有兩儀以儻道中
其可觀樞星是也謂之北極在南者不著故聖人弗
之名焉其世之遂句誤未詳九分而減二陽道左迴故天
運左行有驗於物則人氣左羸形左繚也天以陽迴
地以陰淳是故天致其動稟氣舒光地致其靜承施

候明天以順動不失其中則四時順至寒暑不忒致
生有節故品物用生地以靈靜作合承天清化致養
四時而後育故品物用成凡至大莫如天至厚莫如
地地至質者曰地而已句誤未詳至多莫如水水精爲漢
漢周於天而無列焉思次質也句誤地有山嶽以宣
其氣精種爲星星也者體生於地精成於天隋志引
列居錯峙各有道屬紫宮爲皇極之居太微爲五帝
之廷隋志引皇極作明堂之房大角有席天市有坐
蒼龍連蜷於左白虎猛據於右朱雀奮翼於前靈龜
圈首於後黃神軒轅於中六擾既畜而狼蛇魚鼈罔
有不具在野象物在朝象官在人象事於是備矣懸

象著明莫大乎日月其徑當天周七百三十六分之一地廣二百四十二分之一以紫祖暉之所見四作三陽之類其數奇月者陰精之宗積而成鳥象鳥而有三趾劉昭曜蠱類其數偶其後有馮焉者羿請無死之藥於西王母恒娥竊之以奔月將往枚筮之於有黃有黃占之曰吉翩翩歸妹獨將西行逢天晦芒母驚母恐後且大昌恒娥遂託身於月是爲蟾蜍夫日譬猶火月譬猶水火則外光水則含景故月光生於日之所照魄生於日之所蔽當日則光盈就日則光盡也衆星被耀因水轉光當日之衝光常不合者蔽於地也是謂闇

虛在星星微月過則食日之薄地暗其明也

案舊脫暗字今

依隋書天補繇暗視明明無所屈是以望之若大

者誤

方於中天天地同明繇明瞻明

隋志引無此四字案

明還自奪

依隋志引改

故望之若小

者誤

而揚光在晝則不明也月之於夜與日同而差微星

則不然強弱之差也衆星列布其以神著有五列焉

是爲三十五名一居中央謂之北斗動變挺占

隋志引作

動係實司王命四布於方爲二十八宿日月運行歷

示吉凶五緯經次用告禍福則天心於是見矣中外

之官常明者百有二十四

續漢書注有四字隋志可

名者三百二十爲星二千五百而海人之占未存焉

案漢志海中星占一卷星圖海中占一卷隋志微星之數蓋萬一

千五百二十庶物蠢蠢隋志引作蠢動咸得繫命不然何以

揔而理諸夫三光同形有似珠玉神守精存麗其職

而宣其明及其衰神歇精斂於是乎有隕星然則奔

星之所墜至地則石文曜麗乎天其動者七日月五

星是也周旋右回天道者貴順也近天則遲遠天則

速行則屈屈則留回留回則逆逆則遲迫於天也行

遲者覲於東覲於東屬陽行速者覲於西覲於西屬

陰日與月共配合也攝提案石氏曰歲星一名熒惑

地候案石氏曰填星一名見晨附於日也太白辰星

見昏附於月也二陰三陽參天兩地故男女取則焉

方星巡鎮必因常度苟或盈縮不逾於次故有列司
作使曰老子四星周伯王逢芮各一錯乎五緯之間
其見無期其行無度實妖經星之所然後吉凶宣周
其祥可盡

此文依開元占
經更正外誤

失父零丁

漢戴良

敬白諸君行路者敢告重罪自爲禍積惡致災天困
我今月七日失阿爹念此酷毒可痛傷當以重贈用
相償請爲諸君說事狀我父軀體與衆異脊背偃僂
捲如截脣吻參差不相值此其庶形何能備請復重
陳其面目鵠頭鵠頸獾狗

案此下脫
字未詳

眼淚鼻涕相追

逐吻中含納無齒牙食不能嚼左右蹉似西域駱駝

案此句當有請復重陳其形骸為人雖長甚細材面
脫字未詳目芒蒼如死灰眼眶白陷如羹柸此文恐未全存之
案御覽云戴良字文讓而後漢書獨行傳之戴良字叔鸞未知其為一人與否姑附出於此

非草書

漢趙壹

余郡士有梁孔達姜孟穎者皆當世之彥哲也然慕
張生之草書過於希顏焉孔達寫書以示孟穎皆口
誦其文楷其篇無怠倦焉於是後生之徒競慕二賢
守令作篇人撰一卷以為祕玩余懼其背彼趨此非
所以宏道興世也又想羅趙之所見蚩沮故為說草
書本末以慰羅趙息梁姜焉竊覽有道張君所與朱
使君書稱正氣可以消邪人無其釁妖不自作誠可

謂信道抱真知命樂天者若夫褒杜崔沮羅趙昕昕
有自臧之意者無乃近於矜伎賤彼貴我哉夫草書
之興也其於近古乎上非天象所垂下非河洛所吐
中非聖人所造蓋秦之末刑峻網密官書煩冗戰攻
並作軍書交馳羽檄分飛故爲隸草趣急速耳示簡
易之旨非聖人之業也但貴刪難省煩損複爲單務
取易爲易知非常儀也故其讚曰臨事從宜而今之
學草者不思其簡易之旨以爲杜崔之法龜蛇所見
也其撫扶桔詰屈皆天誤入正文今改不可失也齟齬
以上苟任涉學皆廢倉頡史籀競以杜崔爲楷私書
相與猶謂就書適迫遽故不及草草本易而速今反

以難而遲失指多矣凡人各殊氣血異筋骨心有疎
密手有巧拙書之好醜在心與手可強爲哉若人顏
有美惡豈可學有相若耶昔西施病心捧脣而顰衆
愚效之祇增其醜趙女善舞行步媚盡學者弗獲失
節匍匐夫杜崔張子皆有超俗絕世之才博學餘暇
遊手於斯後世慕焉專用爲務鑽堅仰高忘其罷勞
夕惕不息反不暇食十日一筆月數丸墨領袖如皂
唇齒常黑雖處衆坐不遑談戲展指畫地以草創壁
臂穿皮刮指爪摧折見鰓蘇來切○案舊脫不休輟然其爲字無益於工拙亦如効顰者之增醜
學步者之案此六字墨池編脫依太平御覽七百四十九引補失節也且草書

之人蓋伎藝之細耳鄉邑不以此較能朝廷不以此
科吏博士不以此講試四科不以此求備徵聘不問
此意考績不課此字徒善字既不達於政而拙草亦
無損於治推斯之所言豈不細哉夫務內者必闕外
志小者必忽大俯而捫蝨不暇見天地天地至大而
不見者方銳精於蟣蝨乃不暇焉第以此篇研思銳
精豈若用之彼聖經稽厯協律推步斯程探賾鉤深
幽贊神明覽天地之心推聖人之情折議論之中理
俗儒之譁依正道於雅說濟雅樂於鄭聲興至德之
和睦(宏)大倫之(元)清窮可以守身遺名達可以尊主
致平以茲命世永監後生不亦淵乎

譏許由

魏麋元

潛居默靜。隱於箕山。身在布衣。而輕天下。世人歸其
高行。學者以爲美談。夫際會之間。矯時取譽。至乃抽
簪散髮。背時逆命。隱於山林之中。以此自高。非以勸
智能之士。入通達之教。故譏而責之曰。

太上貴德。其次立功。世殊時異。不得而同。故伯禹過
門而不入。稷契刻節而奮庸。股肱帝室。作民王公。今
子生聖明之世。得觀雍熙之治。則當攄不朽之功。暢
不羈之志。龍飛鳳起。修攝君司。佐天理物。幹成王事。
若子以堯爲闇主。則歷代載其功。以民爲貪亂。則比
屋可封。若夫世濁時昏。上無賢君。忠臣不出。小人聚

羣即當撥煩理亂跨騰風雲光顯時主拔濟生民何
得偃蹇藏影蔽身夫道不虛行士不徒生生則幹時
爲國之楨故伊尹干湯周公相成興治濟世以致太
平生有顯功沒有美名人生於世貴能立功何得逃
位矯世絕蹤丹朱不肖朝有四凶堯放求賢遜位於
子度才處分不能則已何所感激臨河洗耳山居巢
處執心不情辭君之祿忘君之榮居君之地避君之
庭立身若此非子之貞欲言子智則不仕聖君欲言
子高則鳥獸同羣無功可紀無事可論

買冢地劄

晉楊紹

大男楊紹從土公買冢地一丘東極闕澤西極黃滕

南極山背北極於湖直錢四百萬即日交畢日月爲證四時爲任太康五年九月廿九日對共破荆民有私約如律令

奴券

晉石崇

余元康之際出在滎陽東住聞主人公言聲大粗須臾出趣吾車曰公府怪吾家嘵嘵邪中買得一惡羝奴名宜勤身長九尺餘力舉五千斤挽五石力弓百步射錢孔言讀書欲使便病日食三斗米不能奈何吾問公賣不公喜便下絹百疋聞謂吾曰吾胡王子性讀書公府事一不上券則不爲公府作券文曰取東海巨鹽東齊羝羊朝歌蒲薦八板桃牀負之安邑

梨栗之鄉常山細縑趙國之編許昌之總沙房之繇
作車當取高平莢榆之轂無尾髑髏之狀大良白槐
之輻河東茱萸之輞亂節桑轆中脫未詳太山桑光長安
中脫未詳雙入白屋脫誤未詳釘鑲巧手出於上方見好
弓材可斫千張山陰青槻烏皞柘桑張金好墨過市
數蠶并市豪筆備郎寫書皞角幘道脫誤未詳金案玉椀
宜勤供筆更作多辭乃斂吾絹而歸此自御覽
外他書罕載故錄之

斷酒戒

晉庾闡

蓋神明智惠人之所以靈也好惡情欲人之所以生
也明智運於常厓好惡安於自然吾固以窮智之害

性任欲之喪真也。於是椎金罍碎玉碗破兕觥捐觚
瓚遺舉白廢引滿使巷無行槥家無停壺剖樽折杓
沈炭銷鑪屏神州之竹葉絕縹醪乎華都言未及盡
有一醉夫勃然作色曰蓋空桑珍味始於無情靈和
陶醞竒液特生聖賢所美百代同營故醴泉涌於上
世懸象渙乎列星斷蛇者以興霸折獄者以流聲是
以達人暢而不壅抑其小節而濟大通子獨區區檢
情自封無或口閉其味而心馳其聰者乎庾生曰爾
不聞先哲之言乎人生而靜天之性也感物而動性
之欲也物之感人無窮而情之好惡無節故不見可
欲使心不亂是以惡迹止步滅影即陰形情絕於所

託萬感無累乎心。心靜則樂非外唱。樂足則欲無所
淫。唯味作戒。其道彌深。賓曰唯唯。敬承德音。

弔鶴文

晉湛方生

余以①元冬修夜。忽聞階前有孤鶴鳴。遡寒風而清叫。
感淒氣而增悲。屬聽未終。余有感焉。乃爲文以弔之。
惟海嶠之奇鳥。資秀氣以誕生。疑鸞皇而比翼。超羽
族而長靈。濯冰霜之素質。颺九臯之奇聲。啄荒庭之
遺粒。漱絕澗之餘清。望雲舒而息翮。仰朝霞而展征。
輟王子之靈轡。繫虞人之長纓。辭丹穴之神友。與雞
鶩而同庭。軒天衢而奔想。顧樊籠而心驚。獨中宵而
增思。負青霜而夜鳴。資沖天之雋翮。曾不殊於鳥雀。

稟櫛壽之修期。忽同彫於秋薄。匪物之足悲。傷有理而橫落。

筆陣圖

晉衛夫人

若初學書。先須大書。不得從小。善鑒者不寫。善寫者不鑒。多骨微肉者。筋書。多肉微骨者。墨猪。多力豐筋者。聖。無力無筋者。病。一二從其消息而用之。

鰕表

梁韋琳

臣鰕言。伏見除書。以臣爲粽一日熬將軍。油蒸校尉。臠州刺史。脯腊如故。肅承將命。含灰屏息。憑籠臨鼎。載兢載惕。臣美愧夏鱸。味慚冬鯉。常懷鮐服之誚。每懼鼈巖之譏。是以漱流湖底。枕石泥中。不意高賞殊。

私曲蒙鈞拔遂得超升綺席忝預玉盤遠廁玳筵猥
頒象箸澤覃紫脯恩加黃腹方當鳴姜動椒紆蘇佩
櫨輕瓢纔動則樞盤如烟濃汁暫停則蘭肴成列宛
轉綠壘之中逍遙朱唇之內銜恩噬澤九殞弗辭不
任屏營之誠謹列銅鎗門奉表以聞

詔荅曰省表具知卿池沼縉紳陂渠俊乂穿蒲入荇
肥滑有聞允堪茲選無勞謝也

賜錢武肅王鐵券

唐昭宗

維乾寧四年歲次丁巳八月甲辰朔四日丁未皇帝
若曰咨爾鎮海鎮東等軍節度浙江東西等道觀察
處置營田招討等使兼兩浙鹽鐵制置發運等使開

府儀同三司檢校太尉兼中書令使持節潤

輟耕錄作閩非

同越等州諸軍事兼潤越等州刺史上柱國彭城郡

王食邑五千戶食實封一百戶錢鏐朕聞銘鄧隲之

勲言垂漢典載孔惺之德事美魯經則知褒德策勲

古今一致頃者董昌僭偽爲昏鏡水狂謀惡貫深染

齊人而爾披攘兇渠盪定江表忠以衛社稷惠以福

生靈其機也氛祲清其化也疲羸泰拯於粵於塗炭

之上師無私焉保餘杭成金湯之固政有經矣志獎

王室績冠侯藩溢于旂常流在丹素雖鍾繇刊五熟

之釜寶憲勒燕然之山未足顧

輟耕錄作顯非

功抑有異數

是用錫其金版申以誓詞長河有似帶之期泰華有

如拳之日。惟我念功之旨。永將延祚子孫。使卿長襲
寵榮。克保富貴。卿恕九死。子孫三死。或犯常刑。有司
不得加責。承我信誓。往唯欽哉。宜付史館。頒示天下。
中書侍郎兼戶部尚書平章事臣崔允宣奉。

續古文苑卷第二十